

**ბაღდათის მუნიციპალიტეტის მერიის სოციალური და ჯანმრთელობის
დაცვის სამსახურის უფროსის ანგარიში, მიმდინარე (2018) წელს
სამსახურის მიერ გაწეული მუშაობის შესახებ.**

მიმდინარე წელს, მუნიციპალიტეტის მერიის სოციალური და ჯანმრთელობის დაცვის სამსახური საქმიანობას ახორციელებს ბაღდათის მუნიციპალიტეტის საკრებულოს 2017 წლის 29 დეკემბრის N56 დადგენილებით დამტკიცებული „სოციალური და ჯანმრთელობის დაცვის სამსახურის 2018 წლის პროგრამის“ მიხედვით, რომლისათვისაც ბიუჯეტში 395 500 ლარი იქნა განსაზღვრული. აღნიშნულ თანხას დაემატა 2017 წლის ნაშთის სახით არსებული 3500 ლარი, რამაც ჯამში 403 000 ლარი შეადგინა.

სანამ უშუალოდ სამსახურის მიერ გატარებული ღონისძიებებისა და მიმდინარე წელს დაწერული სიახლეების შესახებ საუბარს შევუდგები, მოკლედ გაგაცნობთ ინფორმაციას, პროგრამის თითოეული მუხლის მიხედვით გახარჯული თანხისა და დაკმაყოფილებულ ბენეფიციართა რაოდენობის შესახებ:

პირველი მუხლიდან (სამედიცინო დახმარება) მედიკამენტების შესაძენად (დღეის მდგომარეობით) გახარჯულია 29 126 ლარი, დახმარება გაეწია 478 ბენეფიციარს.

390 ბენეფიციარის სამედიცინო მომსახურების თანადაფინანსებისათვის სხვადასხვა სამედიცინო დაწესებულებაში გადარიცხულია 106 680 ლარი. აგრეთვე, გაცემულია 20 000-მდე ლარის ოდენობის საგარანტიო წერილები, რომლის საფუძველზეც, (შესრულებული სამუშაოს შესახებ დოკუმენტაციის წარმოდგენისას) აღებული გვაქვს სამედიცინო მომსახურების თანადაფინანსების ვალდებულება.

მე-2 მუხლი ითვალისწინებს მეორე მსოფლიო ომისა და საქართველოს ტერიტორიული მთლიანობის, თავისუფლებისა და დამოუკიდებლობისათვის მებრძოლი ვეტერანის გარდაცვალების შემთხვევაში, მათი ოჯახისათვის ფინანსური დახმარების გაწევას 250 ლარის ოდენობით, სარიტუალო ხარჯების ანაზღაურების მიზნით. მიმდინარე წელს აღნიშნული დახმარება 2 ოჯახზე გაიცა, შესაბამისად გაცემულია 500 ლარი.

მე-3 მუხლით განსაზღვრულია საქართველოს ტერიტორიული მთლიანობისათვის დაღუპულ მებრძოლთა ოჯახების დახმარება. დახმარება მიიღო 12 ოჯახმა, გაცემულია 2400 ლარი.

მე-4 მუხლი მუნიციპალიტეტის უფასო სასადილოს ბიუჯეტს განსაზღვრავს, რომლისთვისაც 45 000 ლარი იყო გათვალისწინებული. 10 თვის მონაცემებით ამ მუხლიდან 34 185 ლარია დახარჯული. ამჟამად უფასო კვებით 60 ბენეფიციარი სარგებლობს, თუმცა გარკვეული პერიოდის განმავლობაში ბენეფიციართა რაოდენობა 56 იყო, რის გამოც გათვალისწინებული თანხა სრულად არ გაიხარჯა.

მე-5 მუხლის მიხედვით (ოჯახებისა და ბავშვების სოციალური დაცვა) გაცემული თანხის რაოდენობა შემდეგნაირად გადანაწილდა:

- ✓ მეორე შვილის შეძენის გამო მოგვმართა 65-მა ოჯახმა, შესაბამისად, გაიცა 9750 ლარი.
- ✓ მესამე შვილის შეძენის გამო დაკმაყოფილდა 37 ბენეფიციარი, გაიცა 11 100 ლარი
- ✓ მეოთხე და შემდეგი შვილი შეძენასთან დაკავშირებით 9 ბენეფიციარზე გაიცა 3200 ლარი
- ✓ ტყუპების შეძენის 2 შემთხვევა გვქონდა და შესაბამისად გაცემულია 12600 ლარი.

მე-6 მუხლიდან გაიცემა სტიქიური უბედურებისა და სხვა ობიექტური მიზეზების შედეგად უსახლკაროდ დარჩენილი ოჯახების ბინის ქირა. დღეისათვის მუნიციპალიტეტი ქირით უზრუნველყოფს 12 ოჯახს.

მე-7 მუხლი - სხვა გაუთვალისწინებელი ხარჯები - ითვალისწინებს:

ა) კრიზისულ ვითარებაში ჩავარდნილი ოჯახების დახმარება: ისარგებლა 270 - მა ოჯახმა, გაცემულია 43 150 ლარი.

ბ) მრავალშვილიანი ოჯახების დახმარება : 39 მრავალშვილიან ოჯახზე გაცემულია 8 950 ლარი.

გ) 18 წლამდე ასაკის შშმ პირთა ოჯახების დახმარება გაიცა 34 ბენეფიციარზე. თითოეულზე 150 ლარის ოდენობით, საერთო ჯამში 5100 ლარი.

დ) მარტოხელა (მემკვიდრის გარეშე დარჩენილი) და დევნილ მიცვალებულთა დაკრძალვის ხარჯებისათვის გაიცა 900 ლარი.

მე-8 მუხლით (სადღესასწაულო დახმარების პროგრამა) განსაზღვრული თანხა 10 000 ლარი, მთლიანადაა გაცემული მუნიციპალიტეტში მცხოვრებ 100 ვეტერანზე.

მე-9 მუხლი - შშმ პირთა დახმარება სხვადასხვა აქტივობებზე გახარჯულია 20 000 ლარი.

მე-10 მუხლის მიხედვით, ჩერნობილის ატომური ელ. სადგურის აღდგენითი სამუშაოების მონაწილე 12 პირს ერთჯერადად გადაეცა 150 ლარი და ამ მუხლიდან გაიხარჯა 1 800 ლარი.

მე-11 მუხლი: 4 დღეგრძელ (ას წელს გადაცილებულ) მოქალაქეზე გაიცა 1000 ლარი.

მე-12 მუხლიდან ფინანსდება დიალიზის სახელმწიფო პროგრამით მოსარგებლე ბენეფიციარების ტრანსპორტირების ხარჯები. მიმდინარე წელს ჩვენი მუნიციპალიტეტიდან აღნიშნული პროგრამით 17 ბენეფიციარი სარგებლობს ამ მუხლში გათვალისწინებული ფინანსური რესურსი მთლიანად ამოიწურა.

13 მუხლი : 11 მარტოხელა მშობელს დავეხმარეთ 2200 ლარით და 40 ობოლ ბავშვზე გაიცა 4 000 ლარი. ჯამში, აღნიშნული მუხლიდან გაცემულია 6200 ლარი

მუნიციპალიტეტის ტერიტორიაზე რეგისტრირებული 18 ეკომიგრანტი ოჯახის მონაცემები გადაგზავნილია ლტოლვილთა და განსახლების სამინისტროში საცხოვრებლით უზრუნველყოფის მიზნით, ერთი მათგანი - სოფელ წითელხევში მცხოვრები ელგუჯა მელამის ოჯახი ზაფხულში დაკმაყოფილდა.

მიმდინარე წლის გაზაფხულზე, მუნიციპალიტეტის მერიის შიდა აუდიტის სამსახურის მიერ შეჯამებული იქნა სოციალური და ჯანმრთელობის დაცვის სამსახურის 2017 წლის მუშაობა და გაიცა გარკვეული რეკომენდაციები, რომლებიც ძირითადად სამოქმედო დადგენილებაში არსებული ხარვეზების აღმოფხვრას შეეხებოდა. ჩვენს მიერ, რეკომენდაციების შესრულების მიზნით გატარდა შესაბამისი ღონისძიებები:

- ✓ „სოციალური პროგრამების გაცემის წესის“ მიხედვით, მუნიციპალიტეტში მცხოვრები მოქალაქის დახმარება მხოლოდ ერთჯერადად განისაზღვრებოდა (მაგალითად, თუ ოჯახის წევრს მიღებული ჰქონდა დახმარება შვილის შეძენის გამო, იგი ვერ ისარგებლებდა

მუნიციპალიტეტის პროგრამით განსაზღვრული სამედიცინო თუ სხვა სახის დახმარებით). ცვლილების შემდეგ აღნიშნული შეზღუდვა მოიხსნა და ერთჯერადად განისაზღვრა თითოეული მუხლით სარგებლობის უფლება (თუ, რა თქმა უნდა, იგი აკმაყოფილებს პროგრამით განსაზღვრულ პირობებს).

- ✓ განისაზღვრა აგრეთვე, უფასო სასადილოს მომსახურების მიმღებ ბენეფიციართა შერჩევის კრიტერიუმები და შეიქმნა მომლოდინეთა აღრიცხვის სია.
- ✓ მკაცრად განისაზღვრა სამედიცინო მომსახურების ხარჯების ასანაზღაურებელი თანხის ზედა ზღვარი, რამაც სოციალური ღონისძიებების დაფინანსების განმსაზღვრელი კომისია გარკვეულ ჩარჩოებში მოაქცია. აქვე უნდა აღინიშნოს, რომ ამ ცვლილებამ უკმაყოფილება გამოიწვია ზოგიერთი ბენეფიციარის მხრიდან, რადგან იყო შემთხვევები, როცა მათ ვერ შეძლეს დარჩენილი თანხის გადახდა და ამ მიზეზით უკან დაგვიბრუნეს გამოკვლევისათვის გაცემული საგარანტიო წერილი.

გარდა ზემოაღნიშნული ცვლილებებისა, აუცილებლად მიმაჩნია იმ სიახლის აღნიშვნა, რომელიც მაქსიმალურად გამორიცხავს სამედიცინო მომსახურების კუთხით ჩვენს მიერ გაწეული ხარჯის არამიზნობრიობას. ვგულისხმობ სამსახურის მიერ „საგარანტიო წერილებს“ გაცემის პრაქტიკას, რომლის საფუძველზეც ბენეფიციარს გაეწევა მომსახურება და ჩვენს მიერ განსაზღვრული თანხა მხოლოდ შესრულებული სამუშაოს წარმოდგენის შემდეგ გადაერიცხება სამედიცინო დაწესებულებას.

მიმდინარე წლის ოქტომბრის თვიდან, სოციალური სამსახური გადავიდა საქმისწარმოების ახალ სისტემაზე, რომელსაც „მუნიციპალური მმართველობის სისტემა“ (მმს) ეწოდება. აღნიშნული სისტემის დანერგვისას გარკვეული ხარვეზები აღინიშნებოდა, თუმცა ამ ეტაპზე, ფაქტობრივად სისტემა გამართულად მუშაობს.

დასასრულს მინდა აღვნიშნო, რომ ჩვენი სამსახურის ინიციატივითა და ჩართულობით, ანონიმური კითხვარების გამოყენებით მოხდა უფასო სასადილოს ბენეფიციართა კმაყოფილების დონის განსაზღვრა.

კითხვარების მიხედვით, ბენეფიციარებმა სასადილოს ფუნქციონირების საჭიროება დაადასტურეს და კმაყოფილება გამოხატეს. გამოითქვა ასევე გარკვეული შენიშვნებიც მენიუს შესახებ, რომლის გათვალისწინებაც დაგეგმილია 2019 წლისათვის.

ჩვენი სამსახური, მომავალი წლის განმავლობაში მსგავსი კითხვარის მიხედვით სხვა სოციალური პროგრამის ბენეფიციართა კმაყოფილების დონის განსაზღვრასაც აპირებს, რაც საშუალებას მოგვცემს თითოეული პროგრამა მოქალაქეთა ჩართულობით შემუშავდეს და მაქსიმალურად გავხადოთ იგი ბენეფიციართა საჭიროებებზე მორგებული.

დაგეგმილია, აგრეთვე, გარკვეული ცვლილებები სოციალური და ჯანმრთელობის დაცვის 2019 წლის პროგრამასა და გაცემის წესში, რომელიც ძირითადად დასაფინანსებელი თანხის რაოდენობის ზრდაში გამოიხატება.

მოგეხსენებათ, მიმდინარე წლის ივნისის თვეში ძალაში შევიდა საქართველოს კანონი „სოციალური მუშაობის შესახებ“, რომლის მიხედვითაც თვითმმართველი ერთეულს - მუნიციპალიტეტს ევალება შექმნას სოციალური მუშაკის შტატი. აღნიშნული ჩანაწერი ძალაში 2021 წლიდან შედის, თუმცა ამ ეტაპზე ჩვენთან მემორანდუმის ფარგლებში მოთანამშრომლე

სამოქალაქო საზოგადოებები გამოხატავენ მზაობას, გადაამზადონ და შესაბამისი კომპეტენციები შესძინონ ამ პოზიციისთვის ჩვენს მიერ შერჩეულ კადრს. იმის გათვალისწინებით, რომ სოციალური მუშაკის სამუშაო ნამდვილად ბევრ უნარ-ჩვევასა და გარკვეულ სამართლებრივ ცოდნას საჭიროებს, ვფიქრობ, აღნიშნული ინიციატივის მომავალი წლიდან გამოყენება ჩვენთვის ძალზე სასარგებლო და მისაღები იქნება.

პატივისცემით,

სოციალური და ჯანმრთელობის დაცვის სამსახურის

უფროსი: მარეხ მშვენიერაძე

24. 12. 2018 წ.